



U P U T S T V O
o postupku žrijebanja političkih subjekata za utvrđivanje redoslijeda na glasačkom listiću

Sarajevo, maj 2026. godine

Na osnovu člana 2.9 stav (1) tačka 2, a u vezi s članom 5.15 stav (2) Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22, 67/22 i 24/24), Centralna izborna komisija Bosne i Hercegovine je na 29. sjednici, održanoj 06.05.2026. godine, utvrdila

U P U T S T V O
o postupku žrijebanja političkih subjekata za utvrđivanje redoslijeda na glasačkom listiću

Član 1.
(Predmet)

Uputstvom o postupku žrijebanja političkih subjekata za utvrđivanje redoslijeda na glasačkom listiću (u daljem tekstu: Uputstvo) utvrđuje se postupak žrijebanja političkih subjekata, kako bi se odredio redoslijed političkih subjekata na glasačkom listiću.

Član 2.
(Datum žrijebanja)

Centralna izborna komisija Bosne i Hercegovine (u daljem tekstu: Centralna izborna komisija BiH) najkasnije 73 dana prije dana održavanja izbora vrši žrijebanje ovjerenih političkih subjekata za određivanje redoslijeda na glasačkom listiću.

Član 3.
(Mjesto žrijebanja)

- (1) Žrijebanje iz člana 2. ovog Uputstva vrši se u prostorijama Centralne izborne komisije BiH.
- (2) Izuzetno, ukoliko se žrijebanje ne može održati u prostorijama Centralne izborne komisije BiH, Centralna izborna komisija BiH svojom odlukom određuje drugo pogodno mjesto za žrijebanje ovjerenih političkih subjekata za određivanje redoslijeda na glasačkom listiću.
- (3) O mjestu, datumu i vremenu održavanja žrijebanja Centralna izborna komisija BiH obavijestit će političke subjekte i javnost najkasnije 24 sata prije održavanja žrijebanja.

Član 4.
(Način žrijebanja)

- (1) Žrijebanje iz člana 2. ovog Uputstva vrši se:
 - a) elektronski i/ili
 - b) ručno.
- (2) Svi politički subjekti ovjereni za učešće na izborima i koji imaju ovjerene kandidatske liste učestvuju u žrijebanju za utvrđivanje redoslijeda političkih subjekata na glasačkom listiću.

Član 5.
(Elektronsko žrijebanje)

- (1) Elektronski postupak žrijebanja političkih subjekata je postupak žrijebanja političkih subjekata putem međunarodnog internet-servisa Random.org.

- (2) Elektronsko žrijebanje vrši se na način da se utvrdi Lista političkih subjekata (u daljem tekstu: Lista prijava) po redosljedu prijave političkih subjekata.
- (3) Lista prijava iz stava (2) ovog člana unosi se u aplikaciju, nakon čega se zadanim algoritmom određuje redosljed političkih subjekata na glasačkom listiću.
- (4) Transparentnost procesa osigurava se mogućnošću provjere postupka žrijebanja putem internet-stranice servisa Random.org.
- (5) O utvrđenom redosljedu na glasačkom listiću donosi se odluka koja se usvaja na sjednici Centralne izborne komisije BiH.
- (6) U slučaju tehničke nemogućnosti elektronskog žrijebanja, vrši se ručno žrijebanje.

Član 6. **(Ručno žrijebanje)**

Ručno žrijebanje vrši se na način da zaduženo lice od strane Centralne izborne komisije BiH iz providne staklene posude izvlači pojedinačne kuglice s nazivima političkih subjekata. Nakon svakog pojedinačnog izvlačenja čita se naglas redni broj, kod i naziv političkog subjekta koji se upisuje u tabelu počev od rednog broja 1 pa nadalje, do kraja izvlačenja svih kuglica iz providne staklene posude.

Član 7. **(Prikaz političkih subjekata)**

- (1) Radnje propisane u članovima 5. i 6. ovog Uputstva hronološki se prikazuju putem projektora na ekranu, u skladu s redosljedom izvlačenja naziva političkih subjekata.
- (2) Centralna izborna komisija BiH nakon provedene procedure iz stava (1) ovog člana svojom odlukom određuje redosljed političkih subjekata na glasačkom listiću, koja se javno objavljuje na internet-stranici Centralne izborne komisije BiH www.izbori.ba.

Član 8. **(Zapisnik o postupku žrijebanja)**

- (1) O postupku žrijebanja vodi se Zapisnik.
- (2) Zapisnik se javno objavljuje na internet-stranici Centralne izborne komisije BiH www.izbori.ba i služi kao osnov za ulaganje prigovora na odluku Centralne izborne komisije BiH iz člana 7. stav (2) ovog Uputstva.

Član 9. **(Javnost postupka žrijebanja)**

- (1) Postupak žrijebanja iz člana 2. ovog Uputstva je javan i postupku mogu prisustvovati predstavnici političkih subjekata i medija.
- (2) Centralna izborna komisija BiH može osigurati da se postupak žrijebanja prenosi uživo putem javnih elektronskih medija i/ili *live streama*.

Član 10. **(Upotreba izraza u muškom i ženskom rodu)**

Izrazi koji su radi preglednosti u ovom Uputstvu dati u jednom rodu, bez diskriminacije se odnose na muški i ženski rod.

Član 11.
(Prestanak primjene)

Danom stupanja ovog Uputstva prestaje važiti Uputstvo o postupku žrijebanja političkih subjekata za utvrđivanje redoslijeda na glasačkom listiću ("Službeni glasnik BiH", br. 31/24).

Član 12.
(Stupanje na snagu i objavljivanje)

Ovo Uputstvo stupa na snagu danom donošenja i bit će objavljeno u "Službenom glasniku BiH", "Službenim novinama FBiH", "Službenom glasniku RS", "Službenom glasniku Brčko distrikta BiH" i internet-stranici Centralne izborne komisije BiH www.izbori.ba.

Broj: 05-1-02-2-719-1/26
Sarajevo, 06.05.2026. godine



Predsjednik

Jovan Kalaba